

Program Leadership Diagnostic Menilai Prestasi Kepimpinan Ketua



Kuantan, 12 September – Lebih 50 orang staf Universiti Malaysia Pahang (UMP) yang terlibat secara langsung di bawah penyeliaan beberapa orang pegawai dan ketua jabatan dipilih menyertai Program Leadership Diagnostic anjuran Bahagian Latihan dan Pengembangan Kompetensi (BLPK) yang telah diadakan di Dewan Tun Fatimah dan Dewan Tun Teja, UMP Gambang baru-baru ini.

Menurut Timbalan Pendaftar BLPK, Hazmin Aris berkata, program ini bertujuan untuk mendapatkan input daripada staf yang diselia secara langsung oleh sekumpulan ketua jabatan atau penyelia yang telah dikenalpasti oleh pihak pengurusan universiti yang berpotensi bagi menerajui sesebuah jabatan yang strategik.

“Program ini telah dikendalikan oleh fasilitator atau konsultan luar yang berpengalaman luas dalam bidang pengurusan sumber manusia, pengurusan bakat dan pelan penggantian. Program ini bersifat interaktif dan peserta akan berbincang secara terbuka berdasarkan persepsi corak kepimpinan dan pengurusan organisasi. Semua maklumbalas ini akan dianalisa bagi tujuan pembangunan kepimpinan,” katanya.

Bagi peserta program, Norzarifah Samin dari Fakulti Pengurusan Industri berkata, menerusi program ini staf berpeluang memberikan pandangan dan cadangan secara bebas terhadap pengurusan dan kepimpinan ketua jabatan atau penyelia masing-masing. Katanya, ini merupakan pertama kali sepanjang bertugas di UMP mereka diberikan ruang dan peluang melalui mekanisme rasmi untuk memberikan pandangan, cadangan, komen dan kritikan terhadap ketua jabatan atau penyelia masing-masing secara ilmiah.



Selain itu, ianya membolehkan ketua jabatan dan penyelia berkenaan memperoleh input secara langsung daripada staf di bawah penyeliaan masing-masing yang boleh digunakan untuk menambahbaik kelemahan atau kekurangan terhadap corak kepimpinan mereka. Apatah lagi ianya sangat bermanfaat untuk universiti dalam memastikan pengurusan bakat dan pelan penggantian dapat dilaksanakan secara berterusan bagi memastikan ianya relevan dan sesuai dengan perkembangan semasa.

Sementara itu, Shahrol Azmi Amzat dari Pusat Teknologi Maklumat dan Komunikasi berpendapat, program ini juga dapat membantu dalam meningkatkan prestasi pemimpin di jabatan dalam mencapai sasaran Petunjuk Prestasi Utama (KPI) yang dilaksanakan di peringkat jabatan.

Posted By : NOR FADZILLAH BINTI ZULKIPLI Date Posted : 29-09-2015, 10:48:03